

Mid-Day Dogri News Bulletin 31 Oct. 2025

समां - 12:25 hrs.

<><><><><><>

PM- Modi Sardar Patel

प्रधानमंत्री नरेन्द्र मोदी होरें अज्ज बड्डलै गुजरात दे एकता नगर च भारत दे लौह पुरुष सरदार वल्लभ भाई पटेल हुंदी 150मीं जयंती दे मौके उप्पर राश्ट्री एकता दिवस आहले समारोहें दी अगुवाई कीती। प्रधानमंत्री होरें इस मौके पर सबनें शा पैहले स्टैचु ऑफ युनिटी पर पुशपांजलि अर्पित कीती। इस सरबंध्य च एकता दिवस आहली इक बड़ी भव्य परेड दा बी आयोजन कीता गेआ जेहदे च राश्ट्र दी ताकत ते एकता दा शानदार प्रदर्शन कीता गेआ। इस मौके उप्पर बी.एस.एफ, सी.आर.पी.एफ ते होरनें पुलस बलें दिएं टुकड़िएं आसेआ दलेरी दा प्रदर्शन कीता गेआ। इस बारे एह कार्यक्रम मता खास रेहा कीजे ऐगती राश्ट्र एकता परेड दा आयोजन गणतंत्र दिवस दी तर्ज उप्पर गै कीता गेआ ऐ।

इस मौके पर बोलदे होई प्रधानमंत्री नरेन्द्र मोदी होरें आखेया जे सरदार पटेल हुंदी जयंति राश्ट्रीय एकता दा उत्सव ऐ। मोदी होरें आखेया जे सरदार पटेल होरें राश्ट्र दी एकता-अखंडता ते संप्रभुता गी हर चीज थवां उप्पर रखेआ।

<><><><><><>

LG- Ekta Diwas

उपराज्यपाल मनोज सिन्हा होरें भारत दे लौह पुरुष सरदार वल्लभ भाई पटेल होरेंगी उंदी 150मीं जयंती पर अज्ज श्रद्धांजलि अर्पित कीती। अपने इक संदेस च एल.जी होरें

आखेआ ऐ जे राश्ट्री एकता दिवस दे इस ध्याड़े पर ओह सरदार वल्लभ भाई पटेल होरेंगी उं'दी जयंती पर नमन करदे न ते कन्नै इस गल्लै दी मेद बी करा'रदे न जे एह ध्याड़ा रमानदारी ते इकजुटता दी भावना गी होर मजबूती देग। उ'नें आखेआ जे सरदार पटेल होर राश्ट्री एकता दे वास्तुकार ते राश्ट्र भक्ति दे कन्नो-कन्नी एकता ते अखंडता दी मूरत बी ऐ हे। श्री सिन्हा होरें आखेआ ऐ जे सरदार पटेल हुं'दे मजबूत वचनबद्धता ने गै इक आधुनिक भारत दी मजबूत बुनियाद रक्खी ही ते असें सबनें गी लोड़चदा ऐ जे अस उं'दे विचारें गी अपनां'दे होई एकता दी भावना गी मजबूती देचै कीजे ईआं करना गै सरदार पटेल होरेंगी सच्ची श्रद्धांजलि होग।

<><><><><><>

LG- Home Deptt.

जम्मू-कश्मीर सरकारै औन्दी स्यालै आहली रुतै दौरान गृह मैहकमे गी निर्देश जारी कीता ऐ जे ओह श्रीनगर ते जम्मू दौने थाहरें थवां कन्नो-कन्नी कम्म करै। सरकारी आदेश मूजब एदे च पुलस मुख्यालय- जेलें सरबंधी मुख्यालय- Home Guards, सिविल डिफेंस ते एस.डी.आर.एफ., अभिभोजन निदेशालय-सबूतें ते तथ्यें दी जांच सरबंधी Forensic Science Laboratory, सैनिक कल्याण ते होर दुए सरबंधी दफतर शामिल न। मैहकमे दे प्रमुखें गी आखेया गया ऐ जे ओह दौनें थाहरें पर अमले दी उपलब्धता यकीनी बनान।

<><><><><><>

LG Dogra Samaj

डोगरा समाज ट्रस्ट मुंबई दे इक डेलीगेशनने अपने प्रधान कृशणा पंडित हुंदी अध्यक्षता च कल लेफ्टिनेंट गवर्नर मनोज सिन्हा हुंदे नै मलाटी कीती। इस डेलीगेशन च फिल्म कलाकार मुकेश रिशि ते प्रीति सप्रू हुंदे अलावा ट्रस्ट दे उप-प्रधान गगन मल्होत्रा ते होर बी औहद्धेदार शामिल हे। इस मौके पर उनें मुंबई च डोगरा भवन दी स्थापना बारै एल.जी हुंदे नै चर्चा कीती। तजवीज़ कीता गेदा एह डोगरा भवन, मुंबई च रवा'रदे डोगरा समुदाय दे सदस्ये लेई सांस्कृतिक, शैक्षणिक ते कल्याणकारी केन्द्र दे तौर उप्पर कम्म करग। डेलीगेशन दे सदस्ये जम्मू-कश्मीर च बपार-कारोबार, सैलसफा ते फिल्में सरबन्धी गतिविधिएं गी बढावा देने मतल्लक केई सारे विशे बी एल.जी हुंदे अगगे रक्खे।

<><><><><><>

Dy. CM –Artisans

उपमुख्यमंत्री सुरिंदर चौधरी होरें कल श्रीनगर दे ऐतिहासिक पोलो व्यु बजारें च सोलफुल कश्मीर नांs दे प्रतिष्ठित अभियान तैहत अपने कारीगरें गी जानो नांs दी श्रृंखला दे त्रीये संस्करण गी शुरु करोआया। इस मौके पर बोलदे होई उपमुख्यमंत्री होरें इस पैहलकदमी दे महत्व पर लोs पाई ते आखेआ जे इयै नेह कार्यक्रम, सरकार दे उस मजबूत धेइये गी दर्शादे न जिंदे राहें जम्मू-कश्मीर गी आलमी सतह पर प्रदर्शित करने, ते साढ़े हुनरमंद कारीगरें गी आर्थिक तौर पर सशक्त बनांदे होई कारीगरें सरबन्धी साढ़ी समृद्ध विरासत दे संरक्षण दे जतन बी कीते जा'रदे न।

<><><><><><>

CJI Appointed

न्यायमूर्ति सूर्याकांत होर भारत दे 53में प्रधान न्यायधीश होगन। ओह 24 नवम्बर गी अपना ओहदा संभालगन ते 16 महीने दा उन्दा कार्यकाल होग। ओह केई सारे ऐतिहासिक फैसले जियां जम्मू-कश्मीर थां दफा 370 गी हटाना- बिहार च मतदाता सूचियें दी विशेष नजरसानी सरबन्धी मामले ते लिंग दे आधार पर बरोबरी आहले मामले कन्नै जुड़े दे हे। उन्दा कार्यकाल 9 फरवरी 2027 गी पूरा होग जिसलै ओह 65एं बरे दे होई जागन।

<><><><><><>

CS Edu. Deptt. Review

मुख्य सचिव अटल डुल्लु होरें शिक्षा मैहकमे दी इक व्यापक जायजा बैठक लाई तां जे पढ़ाई-लिखाई ते सिखने आहली पूरी प्रक्रिया दी प्रगति दा जायजा लैता जाई सकै। इस दौरान ढांचागत विकास ते जम्मू-कश्मीर च शिक्षा सरबन्धी सरिस्ते च बदलाव दे मकसद कन्नै तकनीकी आधार आहले बदलावें पर बी चर्चा होई। इस बैठक दा मकसद शिक्षा सरिस्ते गी बेहतर बनाना ऐ- मुख्य सचिव होरें पैहले सोयां तय लक्ष्यें ते समं-सिर उनेंगी हासिल करने पर जोर पाया। उनें एदे लेई मैहकमे गी लम्मी अवधि आहली योजना तयार करने लेई बी आखेया। उनें विद्या समीक्षा केन्द्र तैहत सारे तकनीकी जत्न गी तेजिया कन्नै पूरा करने पर जोर पाया तां जे तय कीते गेदे लक्ष्यें गी हासिल कीता जाई सकै।

<><><><><><>

WWC

आई.सी.सी. महिला इक दिवसीय विश्व कप दे फाईनल च भारत नै प्रवेश करी लैता ऐ।
भारत नै कल राती नवी मुम्बई स्थित डाक्टर D.Y. Patil Sports अकैडमी च खेड्डे गेदे
सैमिफाईनल च आस्ट्रेलिया गी 5 विकेटें कन्नै हराया। 3 सौ उनताली रन्ज दे लक्ष्य दा
पिच्छा करदे होई भारत नै 5 विकेटां बाकी रौंहदे गै एह लक्ष्य हासल करी लैता।

<><><><><><>